

DIE PROFESSOR IN DIE OU TESTAMENTIESE VAKKE

As ons opskrif bo hierdie artikel lui dié professor in die Ou Testamentiese Vakke, dan is dit nie 'n drukfout nie. Intendeel, Prof. Dr. B. GEMSER, wat hierdie jaar 25 jaar as professor in die Ou Testamentiese vakke aan die Universiteit te Pretoria, Afdeling A, is, kan met reg genoem word dié Ou Testamentiese professor in Suid-Afrika. Die skrywer hiervan is oortuig daarvan dat geen onvoorbeoordeelde hierteen beswaar sal maak nie.

Om verskillende redes kan Prof. GEMSER genoem word dié Ou Testamentiese professor in Suid-Afrika. Eerstens omdat hy die eerste was wat as Ou Testamentikus benoem is om in die Ou Testamentiese vakke in S.-A. te doseer. Sy voorgangers in hierdie vakke, sowel in Stellenbosch as in Potchefstroom, het nie op 'n Ou Testamentiese onderwerp gepromoveer nie. Tweedens omdat die teenswoordige professore in hierdie vakke in albei die Kweekskole van Stellenbosch en Potchefstroom vir 'n sekere tyd sy leerlinge was en een selfs onder hom eksamen gedoen het. Derdens omdat Prof. GEMSER die enigste Ou Testamentikus is wat bekendheid verwerf het buite die grense van ons vaderland. In Nederland het hy immers meegewerk aan die serie „Tekst en Uitleg” en het vir sy rekening geneem die deeltjies *Spreuke*, *Prediker*, *Hooglied* en die *Psalms Deel III* wat almal alleen gunstige kritiek van kenners uitgelok het en wat aanleiding daartoe was dat hy uitgenooi is om ook mee te werk aan die „Handbuch zum Alten Testament”. In hierdie Duitse serie het in 1937 uit sy pen verskyn „*Sprüche Salomos*”. In hierdie twee bekende series het sy naam op een lyn verskyn saam met sulke bekende Ou Testamentici as BÖHL, JOH. DE GROOT, VRIEZEN, AAGE, BENTZEN, ALFRED BETHOLET, THEODORE ROBINSON, e.a. As kenner van die moderne Hebreeuse literatuur het ook van hom verskyn „*Nieu-Hebreeuse Kortverhale*” in die serie „Die Kortverhaal” onder redaksie van Prof. Dr. G. DEKKER. Gesien hierdie bogenoemde punte en as rekening gehou word met die feit dat Prof. GEMSER sy studente 'n deeglike vorming gee in die studie van die Ou Testamentiese vakke, dan kan hy genoem word die grondlegger van die studie van die Ou Testament en aanverwante vakke in Suid-Afrika. Dit is alleen maar te betreur dat hy met sy groot kennis van die Hebreeuse taal en van die Ou Testament nie aangewys is as een van die Bybelvertalers in Afrikaans nie, maar slegs 'n paar keer sy hulp deur die hoofvertaler ingeroep is by die moeilikste plekke.

Die Kuratorium is dankbaar teenoor God dat Hy in sy voorsienige wysheid die weg van Prof. GEMSER na ons Kerk en volk gelei het en dat hy so gelei is dat hy twee keer eervolle benoemings in Nederland van die hand gewys het en dat in die derde geval die

omstandighede so beskik is dat die derde benoeming nie opgevolg kon word nie.

Vir 'n kwarteeu het sy rustige, toegewyde doseerwerk aan die toekomstige predikante van die Ned. Hervormde Kerk deurgegaan. Die Kerk pluk in die prediking van hierdie manne, mede deur hom gevorm, die goeie vrugte. Sy leerlinge het groot waardering vir sy klasse en vir die deeglike wyse waarop hy hulle inlei en bekwaam tot die studie van die Ou Testament.

Die Kuratorium wil hom, as dit God mag behaag, nog lank behou as die professor in die Ou Testamentiese vakke en bid God om hom te spaar en die kragte te gee om nog vir jare voort te gaan met die vorming van toekomstige leraars en met sy arbeid in die diens van die Kerk en vir die bevordering van die Bybels-Reformatoriese Teologie in Suid-Afrika.

JOH. DREYER,

Voorsitter van die Kuratorium.